



ACTA DA SESIÓN ORDINARIA DO PLENO DA CORPORACIÓN REALIZADA O 22 DE FEBREIRO DE 2017.

Concelleiros asistentes:

D. Manuel González López  
D. Julián Ramón Seijas Criado.  
Dª. Esperanza Gayoso Pereiro.  
D. Javier Fernández Brage  
D. Delfín Feal Pereira.  
D. Carlos Ladra Brage  
Dª. Concepción Rodríguez Ferreiro  
D. Iago Varela Martínez.  
Dª. María Eva García Amor  
D. Xosé Manuel Pérez Sardiña

No salón de sesións da Casa do Concello de Cabanas, sendo as dezanove horas e trinta minutos do día vinte e dous de febreiro de dous mil dezasete, en primeira convocatoria e baixo a presidencia do Sr. Alcalde Germán Castrillón Permuy, coa asistencia dos Sres. Concelleiros relacionados á marxe e do Secretario titular Antonio López Vila, reúñese o Pleno da Corporación en sesión ordinaria segundo a convocatoria remitida ao efecto.

Unha vez comprobada a existencia de quórum para a válida constitución do Pleno, a Presidencia declara aberta e pública a sesión, procédese a trata-los asuntos incluídos na Orde do Día.

PARTE RESOLUTIVA.

1.- APROBACIÓN SE PROCEDE DE ACTA DE SESIÓN ANTERIOR. Dada conta da acta da sesión realizadas o día 26 de outubro de 2016, da cal entregouse copia coa convocatoria a tódolos concelleiros; o Sr. Presidente pregunta se algún membro da Corporación ten que formular algunha observación, e non presentándose alegacións, o Pleno da Corporación en votación ordinaria, co voto a favor dos once membros que o compoñen, acorda aproba-la referida acta.

2.-CONVENIO DE COLABORACIÓN ENTRE O CONCELLO DE FERROL E A MANCOMUNIDADE DE CONCELLOS DA COMARCA DE FERROL PARA MELLORA SERVIZO DA CASA DE ACOLLIDA DE FERROL.Visto o acordo adoptado polo Pleno da Mancomunidad de Municipios da Comarca de Ferrol sobre aprobación do convenio interadministrativo de colaboración ente o Concello de Ferrol e a Mancomunidad de Concellos da Comarca de Ferrol para a mellora do servizo da casa de acollida de Ferrol, así como o texto do referido convenio.

Na deliberación do asunto prodúcense as intervencións coas opinións que de forma sintetizada se recollen a continuación.

Polo grupo Mixto: o concelleiro do BNG Iago Varela Martínez considera fundamental que os concellos colaboren entre si para prestar servizos a veciñanza de maneira máis eficiente, o caso da casa de acollida é fundamental pois estamos no 2017 e segue habendo mortes machistas, agora mesmo está habendo manifestacións que lle gustaría saudara este pleno, a colaboración dos concellos é fundamental e votará a favor.

O concelleiro de PDDdG Xosé Manuel Pérez Sardiña está de acordo con esta proposta da Mancomunidad, é unha vía para ter un servizo que Cabanas doutra maneira non podería acceder a el, unha necesidade a vista da lacra que representa a violencia machista, tamén manifesta o seu apoio as manifestacións.



Polo grupo Popular: o Sr. Alcalde manifesta que é importante esta actuación para a sociedade en xeral, goberne quen governe, polo tanto están a favor.

Despois de estudiado o asunto, o Pleno da Corporación en votación ordinaria co voto a favor dos once membros que o compoñen, acorda:

Aprobar o convenio interadministrativo de colaboración entre o Concello de Ferrol e a Mancomunidade de Concellos da Comarca de Ferrol para a mellora do servizo da casa de acollida de Ferrol, cunha vixencia prevista de catro anos e unha achega por parte do Concello de Cabanas de 1.037,01 euros o primeiro ano e 1.566,09 os anos seguintes.

**3.- PROPOSTA MANCOMUNIDADE DE CONCELLOS DA COMARCA DE FERROL SOBRE SANEAMENTO REFUXIO DE ANIMAIS.** Vista a resolución do Presidente da Mancomunidade de Concellos da Comarca de Ferrol sobre aceptación da subvención outorgada pola Vicepresidencia e Consellería de Presidencia, Administracións Públicas e Xustiza con cargo ao Fondo de Compensación Ambiental para o ano 2016 para “Saneamento do Refuxio mancomunado de animais (investimento), así como, a distribución de achegas a realizar polos concellos da Mancomunidade para dito proxecto.

Na deliberación do asunto prodúcense as intervencións coas opinións que de forma sintetizada se recollen a continuación.

Polo grupo Mixto: o concelleiro do BNG Iago Varela Martínez está a favor do saneamento do refuxio de animais, aclarando que saíron denuncias na prensa sobre o mal estado e malas condicións de animais pero segundo manifestación do Alcalde na comisión estas informacións son falsas co cal votará a favor.

O concelleiro de PDDdG Xosé Manuel Pérez Sardiña tamén votará a favor, a situación da canceira pola que preguntaron non era idónea e trátase dunha instalación necesaria para que os animais teñan unhas condicións mínimas, sendo outro dos servizos a prestar a través da Mancomunidade porque sería complicado facelo a través do Concello.

Polo grupo Popular: o concelleiro Julián Seijas Criado indica que estivo na canceira, o de que non tiñan teito é mentira, hai unha zona de recollida que está sen teito pero no mesmo día pasan a outras zonas con teito.

Despois de estudiado o asunto, o Pleno da Corporación en votación ordinaria co voto a favor dos once membros que o compoñen, acorda:

Comprometerse a realizar a achega correspondente a este concello por importe de 376,50 euros con destino ao financiamento do proxecto Saneamento do refuxio mancomunado de animais, da Mancomunidade de Concellos da Comarca de Ferrol.

**4.- LIQUIDACIÓN MANCOMUNIDADE DE CONCELLOS DA COMARCA DE FERROL SOBRE SERVIZOS PRESTADOS POLA ASOCIACIÓN FERROLÁ DE DROGODEPENDENCIAS EN 2016.** Dada conta da Liquidación por servizos prestados pola Asociación Ferrolá de Drogodependencias en 2016, aprobada polo Presidente da Mancomunidade de Concellos da Comarca de Ferrol mediante decreto do 29 de decembro de 2016, coas achegas que corresponden a cada concello da Mancomunidade, 317,45 euros no caso do concello de Cabanas.



Na deliberación do asunto prodúcense as intervencións coas opinións que de forma sintetizada se recollen a continuación.

Polo grupo Mixto: o concelleiro do BNG Iago Varela Martínez reitera o apoio a esta proposta, o traballo que está a facer Asfedro e outras asociación da comarca na prevención da drogodependencia e condutas aditivas, recorda que xa presentaron unha moción sobre este tema en marzo de 2016 e pensa que segue vixente.

Despois de estudiado o asunto, o Pleno da Corporación en votación ordinaria co voto a favor dos once membros que o compoñen, acorda:

Prestar conformidade coa liquidación aprobada polo Presidente da Mancomunidade por servizos prestados pola Asociación Ferrolá de Drogodependencias en 2016 e o pagamento da achega correspondente a este Concello por importe de 317,45 euros.

**5.- ELECCIÓN XUIZ DE PAZ TITULAR DE CABANAS.** Visto o expediente incoado en virtude de comunicación do Tribunal Superior de Xustiza de Galicia, para nomeamento de Xuíz de Paz titular do xulgado de Paz de Cabanas, no que consta informe de Secretaría sobre a lexislación de aplicación e procedemento a seguir.

Visto que no período de presentación de solicitudes de acordo cos anuncios publicados no BOP nº 15 do 23 de xaneiro de 2017, e taboleiro de anuncios da Casa do Concello, presentáronse sete solicitudes que corresponden a Dona Mirian Ares Fernández, Dona Sabela Galdo Fernández, Don Diego Valentín Garrote Fraga, Don Serafín Díaz Regueiro, Dona Ana García Campos, Dona Ana Penín Abad e Dona Belén Penín Abad.

Iniciada a deliberación, o Sr. Alcalde indica que a elección se realizará por voto secreto, mediante papeleta depositada en urna na que se marcará o candidato seleccionado. A seguir procédere a votación e posterior escrutinio co seguinte resultado: Don Diego Valentín Garrote Fraga sete votos, Dona Ana Penín Abad un voto, Dona Mirian Ares Fernández un voto, Don Serafín Díaz Regueiro un voto, e un voto en branco.

Habendo obtido maioría absoluta do Pleno da Corporación Don Diego Valentín Garrote, resulta elixido para ser nomeado xuíz de paz titular de Cabanas.

Dar traslado do presente acordo e expediente, ao Xulgado de 1ª Instancia de Ferrol, para que o eleve a Sala de Goberno do Tribunal Superior de Xustiza de Galicia.

**6.- PRAGA DA COUZA GUATEMALTECA. PROPOSTA CONCELLEIRO DO BNG.** En relación coa proposta presentada polo concelleiro do BNG Iago Varela Martínez sobre a praga da couza Guatemalteca, toma a palabra para indicar que presentou a moción ante as dúbidas que se crearon no concello sobre a zona afectada e a prioridade de publicación do decreto para rematar coa incerteza, establecemento de axudas e campaña informativa, inda que non está de acordo na totalidade con esta proposta de declaración institucional, recolle as súas demandas, e resulta unha forma de chegar ao maior consenso posible, dando lectura a seguinte declaración institucional:

O pasado 6 de febreiro o DOG publicaba a relación dos 31 concellos galegos, entre eles o de Cabanas, afectados pola praga da Tecia Solanivora, coñecida na zona como verme ou velaíña da pataca. As zonas demarcadas estableceronse baseándose nas infeccións que se produciron ao longo do ano 2015 e as que se puidesen producir en campañas posteriores, formulándose unha serie de medidas obligatorias e outras recomendacións para adoptar os agricultores nas áreas afectadas;



entre as primeiras, a colocación de trampas con feromonas sexuais para a captura masiva, utilizar semente libre de praga certificada con garantía sanitaria, realizar durante o cultivo tratamentos con materias activas autorizadas ou retirar do terreo e destruír tódolos tubérculos achados; entre as recomendacións formulouse a necesidade de preparar o terreo e desenterrar quince días antes da planta, os tubérculos afectados de campañas anteriores, recollelos e eliminálos, na sementeira enterrar unha profundidade mínima de 15 cm., ou facer rotación de cultivos.

O Ministerio de Agricultura e Pesca anunciou a publicación dun decreto sobre esta praga presente en varias Comunidades, do que ata a data deuse traslado as diferentes Comunidades Autónomas, entre elas Galicia, para o seu estudo e presentación de alegacións; no devandito decreto o Goberno de España establecerá as medidas a adoptar respecto da *Tecia Solaniwra*, pola súa banda a Xunta a través da Concellería do Medio Rural informou dos datos que ía recollendo ademais de presentar as correspondentes alegacións ao texto do goberno central; en coordinación co sector e outras administracións a Consellería puxo en marcha diferentes medidas de seguimento, control e coordinación, así, no norte da Coruña hai 400 trampas instaladas ao aire libre e outras 300 en almacéns que nos últimos 15 meses permitiron a captura de preto de 14.000 insectos e procedeuse ao reparto de 1.500 grilleiras con feromonas para capturar femiais. A final de 2015 había unha liña de axudas pola que se abona 30 céntimos por quilo de pataca destruída e centra agora os seus esforzos en ofrecer a información disponible a día de hoxe; inda que na actualidade afecta a Galicia nas zonas nas que a pataca se dedica fundamentalmente a autoconsumo, existe unha ameaza real de que se estenda e alcance a áreas nas que se cultiva para a venda, construíndo para moitos galegos/as o seu medio de vida, especialmente da indicación xeográfica protexida, *pataca de Galicia*.

Desde o concello de Cabanas consideramos que todos os esforzos son poucos para atallar unha praga con terribles efectos para a economía doméstica de tanta familias do municipio, consideramos tamén que o papel da administración é fundamental para combater esta praga e lograr a súa erradicación, solicitamos celeridade nas actuacións e principalmente do Ministerio de Agricultura, responsable de establecer as pautas para afrontar esta situación e poder así o Concello trasladar unha información clara e concisa aos agricultores do municipio e tamén as familias que cultivan cada ano patacas para autoconsumo, e a concienciación de todos/as con respecto as nefastas consecuencias de non tomar as medidas adecuadas é fundamental, veciños e veciñas deben acceder a unha información fiable e veraz para poder unirse a esta batalla que debe encabezar a administración estatal.

Reclamamos así mesmo, o establecemento a maior brevidade segundo o establecido no lexislación vixente do Decreto 1190/1998, Lei 43/2002, entre outras, de liñas de axudas e compensación dos prexúzos económicos para persoas propietarias afectadas, indo máis alá dos pagos da pataca destruída, incluíndo tanto a explotación comercial como cultivos de autoconsumo; en todo caso, o Concello non quere limitarse a solicitar doutras administracións celeridade e eficiencia, senón sumarse a resolución do problema no marco das súas competencias, en primeiro lugar trasladando a tódolos veciños e veciñas afectados as medidas e recomendacións aprobada ata a data da primeira organización dunha charla informativa a que seguirán as que sexa preciso celebrar, será o 23 de febreiro na Casa do Concello as 19:30 horas, ao respecto o Concello fai un chamamento á participación dos veciños e veciñas de Cabanas; en segundo lugar, o Concello establecerá un servizo de atención e asesoramento veciñal sobre a praga, informará desta e sobre



CONCELLO  
DE  
CABANAS

todo axudará a resolver as dúbidas dos afectados e a tramitar a liña de axudas habilitadas pola Consellería de Medio Rural, abrir as súas portas luns e mércores de 10:30 a 12:00 horas; o obxectivo do Concello de Cabanas é poñer todos os seus medios materiais e persoais para intentar contribuír a resolución desta problemática e así defender os intereses dos seus veciños e veciñas.

Sobre esta declaración, prodúcense as intervencións que de forma sintetizada se reflicten a continuación,

O concelleiro de PDDdG Xosé Manuel Pérez Sardiña, non está de acordo con que na declaración institución haxa referencia ao que fan outras administracións porque de poñer algúin relato tamén habería que incluír o da poboación afectada, non ve os actos da Xunta, refírese as zonas de afectación en Cabanas, o primeiro caso deste verme foi hai 15 anos na zona dos Alimpadoiros, na cabeceira de Fontao, non houbo problema ata que acabou afectando todo, pasou tempo e tamén se trouxeron patacas de Canarias e madeira do porto de Ferrol dando lugar a unha infestación maior; despois está o problema dos tractores que son claves no proceso desde hai 4-5 anos e en 2016 foi o salto definitivo sen que ata día de hoxe se teña más información da que disponen os concelleiros, na declaración fálase de cousas que non coñece, resultalle chocante que se poida plantar en Hombre e en Irís non, por elo hai veciños que van plantar alí, tamén lle gustaría saber que fixeron as administracións nestes ano e está de acordo en pasar da declaración e que a sociedade civil pode fazer fronte a esta situación, as administracións preocupáronse de problemas colaterais.

O voceiro do grupo socialista Delfín Feal Pereira manifesta que pudo aparece hai 15 anos pero está declarada oficialmente en 2015, o grupo socialista non participou na declaración institucional, pensou que se trataría no debate da moción, destaca que as competencias en Medio Rural en Galicia son da Comunidade Autónoma e as competencias en sanidade vexetal son do Ministerio de Agricultura en Madrid, fálase das medidas do borrador de decreto, pero as recomendacións xa estaban feitas en novembro de 2015 e no 2016 non se moveu nada e aí están as consecuencias; o problema agora é a mala información que hai desde a Consellería de Medio Rural, os técnicos saben o que hai que facer, o Concello ten que dar a información que lle transmiten e cando esta non é a idónea ven o desconcerto, alude a resolución de novembro de 2015 e a de febreiro de 2017 que sempre fan referencia ao Real Decreto que vai sacar o Ministerio, agora hai noticias que se vai prohibir plantar en marzo, cunha información non veraz estase confundindo a poboación e impedir a eficacia da loita contra a praga, se nas oficinas de Extensión Agraria non saben o que hai que facer que información pode dar o Concello, o único axudar a facer as declaración de fincas a plantar que parece ser que hai que facer, alude tamén a experiencia de Narón, de todos modos está de acordo coa declaración.

O Sr. Alcalde fala da reunión a celebrar con técnicos da Xunta e a partir de aí actuarase, hai moitas solicitudes de información e despois da reunión o Concello a transmitirá e axudará dentro das súas posibilidade, considera que a Xunta non andou demasiado áxil e debía haber actuado antes, hai que intentar dar a maior información aos veciños/as; é posible que se detectara hai 15 anos, aquí está recollido desde 2015, pero si a xente cando ten un problema coas patacas e non as leva analizar non se pode saber, despois a xente ten que concienciar de que ao mellor ten que deixar un ano sen plantar patacas e facer os procesos recomendados, informouelle unha persoa que o ano pasado colocouse unha trampa en Xicos e non estivo infestada, na charla de mañá van a vir



técnicos da Xunta e explicarán e darán información sobre todo isto e verase o que pode facer o Concello.

O Sr. Pérez Sardiña ten claro que o problema é grave, hai unhas 200 familiar que plantan para autoconsumo, o problema é que non levan analizar o que teñen, pero hai patacas tiradas polos camiños que tiñan ese bicho, non hai control.

O Sr. Alcalde insiste na concienciación da xente, hai que sensibilizala do problema, o dos tractores ten razón, xa lle dixo a algúns que debían desinfectalo antes de metelo na leira, é necesario traballar todos na mesma dirección e que a xente non traslade esa pataca a outras zonas, neste sentido hai noticia de que a Consellería se está a poñer en coordinación con Tráfico para controles de movementos de patacas, pode se que se vaia tarde pero algo hai que facer.

#### 7.- PLAN ÚNICO DEPUTACIÓN DA CORUÑA. PROPOSTA GRUPO POPULAR.

Vista a proposta presentada polo grupo Popular para que o goberno da Deputación da Coruña garanta que o concello de Cabanas percibirá, como mínimo, a través do novo Plan Único, os mesmos fondos que recibían coas liñas de subvención que existían con anterioridade, en cuxa exposición de motivos aluden a aprobación polo Pleno da Deputación da Coruña no pasado mes de novembro o Plan Único dos Concellos que unifica o Plan de Obras e Servizos, o Plan de Acción Social e o Plan de Aforro e Investimentos e 11 liñas de subvencións, aluden ao financiamento do POS 2017 coas achegas que anos anteriores ían a ditos plans e remanentes, propoñendo a adopción do seguinte acordo:

1. Que a Deputación da Coruña garanta que o concello de Cabanas, como mínimo, non verá reducidos os ingresos que percibiu o ano pasado a través do Plan de Obras e Servizos, o Plan de Acción Social e o Plan de Aforro e Investimentos e 11 liñas de subvencións: cultura, deportes, promoción, económica, turismo, desenvolvemento de servizos sociais, políticas de igualdade, envellecemento activo).

2. Que a institución provincial comprométase a incluír na partida orzamentaria coa que arranca o Plan Único dos Concellos os remanentes de tesourería que se vaian xerando ao longo do exercicio económico do 2017.

Na deliberación do asunto prodúcense as intervencións coas opinións que de forma sintetizada se recollen a continuación.

Polo grupo Socialista: o voceiro Delfín Feal Pereira manifesta que o Plan Único aprobado pola Deputación Provincial da Coruña é un modelo singular de cooperación entre a Deputación e os concellos que pretende mellorar e simplificar as fórmulas de cooperación facilitando a elaboración do seu orzamento e dar resposta as necesidades de cada concello, ao mesmo tempo simplifica as tarefas administrativas; destaca a distribución de fondos con criterios obxectivos e o avance na transparencia, o seu carácter dinámico coa posibilidade de dotación complementaria con cargo a remanentes e afonda no concepto de autonomía local, non se esixe cofinanciamento aos concellos, ofréceselles un mecanismo para sanear as contas públicas e facilita que os concellos rebaixen o período medio de pago, evitando que concellos con problemas económicos se vexan na obriga de reducir servizos ou subir taxas e impostos; compara datos de cooperación da Deputación e da Xunta de Galicia e considera que en vez destes acordos que presenta o grupo de goberno habería que acordar instar a Xunta a que sega os pasos da Deputación, actuando con transparencia no reparto de fondos.



CONCELLO  
DE  
CABANAS

Polo grupo Mixto: o concelleiro do BNG Iago Varela Martínez alude a protesta na Deputación Provincial na que participou o Alcalde por dar máis cartos que o que facía o PP, opina que a moción non hai por onde collela, non fai falta pedir que o concello de Cabanas non vexa reducidos os ingresos con respecto posto que xa o especifican as bases do plan, tamén contempla novas achegas ao longo de 2017, o de incluír os remanentes de tesourería que se vaian xerando é irrealizable e vostedes debían sabelo, porque a acción de goberno da Deputación non podería levarse a cabo na totalidade; son os primeiros en querer baleirar de contido as deputacións e de aí que se empreguen criterios obxectivos e capacidade de decisión aos concellos, pero a Deputación segue a ter que apoiar técnica e administrativamente a boa parte dos concellos, atender vías provinciais e outras vías de colaboración cos concellos que obvian nesta moción, como servizos sociais, cultura, patrimonio, igualdade, turismo, etc. sen contar coas axudas no tecido asociativo, entende que aos señores do PP non lle guste o Plan Único porque reduce as subvencións nominativas, fai comparación co último exercicio de goberno do PP considerando que distribuían os cartos a dedo.

O concelleiro de PDDdG Xosé Manuel Pérez Sardiña vendo como está feita a proposta do PP, considera que se caracteriza polo oportunismo e dirixismo do presidente do PP na Coruña Sr. Diego Calvo, desde as Mareas apostan pola supresión das Deputacións e o reparto de competencias entre a Xunta e os concellos, os fondos da Deputación pódense repartir de xeito proporcional a poboación cun factor corrector para concellos pequenos, para iso hai que ir máis aló de plans concretos, reducir subvencións discretionais; esta proposta do PP descubre as súas intencións de andar para atrás e facer da Deputación un niño de caciquismo, queren afogar o control dos plenos das Corporación e blindar a nula capacidade da cidadanía sobre as subvencións que se distribúen entre amigos, votará en contra porque é unha trapallada máis.

Polo grupo Popular: o voceiro Manuel González López manifesta que o que piden no Plan Único é non ver reducidos os ingresos que recibiron en 2016, os orzamentos están incrementándose na maioría das institucións pola mellora da economía en xeral, tamén son coñecedores que as contas desta institución que se están a referir son das más solventes de España, este concello ten delegada a recadación nos servizos tributarios da Deputación e gustaríalle estudar a posibilidade de que os concellos que aportan ingresos a Deputación tiveran unha porcentaxe na valoración dos plans, pois hai concellos que non aportan nada e sen embargo asígnaselles proporcionalmente igual que os que aportan, en definitiva buscan mellorar os investimentos municipais.

O Sr. Feal Pereira opina que isto non deixa de ser máis que unha pataleta política, o plan foi aprobado por ampla maioría, ao PP non se lles ocorreu mentres gobernaron e non poden tolerar que a distribución de fondos aos concellos se faga con criterios obxectivos e con transparencia, isto vai obrigar a Xunta a facer o mesmo e modificar o criterio actual con que reparte os fondos; este Plan da Deputación cambia o xeito de gobernar clientelar a un xeito democrático e transparente, o cadre económico dos fondos demostra o cambio, incrementándose tódalas transferencias aos concellos, agás subvencións nominativas, tamén indica que se van recibir máis cartos que cando gobernaba o PP, ademais se vai incrementar a contía ao longo do ano, e insiste na vantaxes de coñecer unhas contías antes de aprobar os orzamentos, fazer fronte a débedas e pago a provedores mantendo o límite do teito de gasto, reiterando que habería que cambiar a proposta para instar a Xunta que sega estes pasos.



O Sr. Varela Martínez indica que o bo da transparencia é que as cifras son públicas. poden consultarse na páxina da Deputación e ver que os concellos reciben máis cartos que en anos anteriores, o PP ten medo a que se consolide un modelo politicamente ben aceptado polos concellos e polo funcionamento do ente provincial, xa non procedería resolver os remanentes xerados por medio de subvencións nominativas, fai referencia a dotación do plan aprobado pola Deputación Provincial e ao incremento previsto co remanente, nunca antes se dotou o Plan desta contía, agora se poñen os cartos nos orzamentos municipais sen ter que traballar con modificativos.

A concelleira de AEC M<sup>a</sup>. Eva García Amor espera que na Deputación se reparta de forma sensata e xusta as aportacións as corporacións locais, é obriga do Concello loitar por seguir recibindo os mesmos importes e incluso máis, considera que é más sinxelo repartir a subvención tal e como se está a facer agora pero non vai entrar en discusións políticas, o importante é que o concello de Cabanas sega a percibir as mesmas achegas que ata agora.

O Sr. Pérez Sardiña conclúe que nesta proposta o PP non fai máis que asegurarlle o negocio con servizos públicos, e para iso nada mellor que a través de institucións que non son de elección directa nin teñen mecanismos de control cidadán.

O Sr. Alcalde manifesta que se fala do que van facer, parécelle ben que aporten máis diñeiro, pero recorda que o PP estivo gobermando en 2015 e deixou a Deputación a cero de débeda e por iso agora se pode facer esta xestión, deportes, cultura, servizos sociais, etc. están dentro do plan, a data de hoxe son case 80.000 euros menos, se seguen aumentando ben, pero hai que loitar para que veña diñeiro e investir en obras e servizos, insiste tamén que se debería ter en conta os concellos que aportan diñeiro por xestión tributaria e sen embargo o reparto é igual.

Debatido o asunto sométese a votación ordinaria, resultando cinco votos a favor dos membros do grupo Popular, cinco en contra dos membros do grupo Socialista, concelleiro do BNG e concelleiro de PDDdG, e unha abstención da concelleira de AEC

Sometido o asunto a votación resultan cinco votos a favor dos membros do grupo Popular, cinco en contra dos membros do grupo Socialista, concelleiro do BNG e concelleiro de PDDdG, e unha abstención da concelleira de AEC. Producíndose empate e de conformidade co artigo 46.2.d) da Lei 7/1985, do 2 de abril, repítese a votación, obtendo o mesmo resultado, a vista do cal decide o voto a favor do Presidente, quedando aprobada dita proposta.

#### PARTE DE CONTROL ÓRGANOS DA CORPORACIÓN.

##### 8.- INFORMES DA PRESIDENCIA.

a) Resolucións da Alcaldía.Dáse conta das resolucións ditadas desde a número 026 do 20-01-2017 ata a número 075 do 17-02-2017.

b) Informe período anual (4T) sobre a morosidade. Infórmase dos datos PMP anual 2016 (4T) remitidos ao Ministerio de Facenda e Administracións Públicas, Secretaría Xeral de Coordinación Autonómica e Local en cumprimento do establecido no artigo 4.1 b) da Orde HAP/2105/2012, do 1 de outubro.

##### 9. ROGOS E PREGUNTAS.

a) Preguntas orais.

a.1. Grupo Socialista: Intervención do concelleiro Carlos Ladra Brage.



CONCELLO  
DE  
CABANAS

a.1.1. Visto que hai varias sinalizacións municipais que se instalaron nos últimos anos en mal estado ou rotas, vanse a repoñer?

Resposta Alcalde: si, se pode diga cales son.

a.1.2. Solucionaron tódalas incidencias notificadas polos últimos temporais?, queda algunha por resolver?.

Resposta Alcalde: creo que están todas resoltas en xeral, pode haber algunha reparación que non estea ao cen por cen.

a.1.3. Fíxose unha revisión xeral do piñeiral para revisar que tódolos piñeiro estean en bo estado despois dos temporais?

Resposta Alcalde: si, hai unha memoria da técnico municipal onde suxire unha serie de cousas que algunas xa se fixeron.

a.2. Intervención do concelleiro do BNG Iago Varela Martínez.

a.2.1. Sobre as obras do parque do Areal aparentemente está todo aquilo levantado e que non se está a facer nada, pode estimar cando vai quedar iso resolto?, aquilo é un criadeiro de ratas e roga que mentres se fai iso se asegure ben o peche con medidas de seguridade xa que pode colarse un neno e haber unha desgraza.

Resposta Alcalde: hai unha partida a incorporar de remanentes coa que se financiará a obra, intentarase cerrar mellor porque os rapaces xogan a fútbol, escapa o balón, saltan a valla e logo non a volven a poñer, precintarase mellor.

a.2.2. Producuse algún avance para que o Concello dispoña de desfibriladores externos semiautomáticos coñecidos como DESA?, pois chegaron queixas de que os clubs deportivos teñen que contratar servizos de ambulancia cada vez que hai algún partido.

Resposta Alcalde: estase a espera de presupostos, logo pasaranse a Intervención para ver as posibilidades de contratar.

a.2.3. Rogo. Á vista do que aconteceu durante o temporal na zona do piñeiral, ao mellor compensaba cun temporal desas magnitudes mirar de poñer cintas para que a xente no entre, ou algúns mecanismos de seguridade.

Resposta Alcalde: poñer portas ao temporal é difícil, temos que avisar a xente que non entre, é difícil poñer cintas a todo o piñeiral, a xente ten que ser consciente de que pode entrar nunha zona perigosa.

a.3. Intervención do concelleiro de PDDdG Xosé Manuel Pérez Sardiña.

a.3.1. Pódenos explicar como negociou o alcalde os orzamentos para 2017 cos grupos políticos municipais, a quen chamou e cales foron os principais pactos?

Resposta Alcalde: non houbo tales pactos, comentouse e falouse nas comisións que se fixeron.

a.3.2. Houbo varias resolucións sobre os chalets de Cardeita nestes últimos meses, en que situación se atopan as obras dos chalets de Isla Mourón?

Resposta Alcalde: pois haberá que preguntarlle ao técnico.

a.3.3. Cantos expedientes de reposición da legalidade caducaron no que vai de lexislatura?

Resposta Alcalde: espero que ningún.

a.3.4. Suxírolle ao goberno local que retire o lixo abandonado desde hai dous anos no



Portiño, na parroquia de Irís, xusto debaixo da ponte da autoestrada, agora alí xa se bota de todo.

b) Preguntas por escrito.

b.1. Preguntas presentadas polo concelleiro do BNG Iago Varela Martínez en escritos de data 21 de febreiro de 2017.

b.1.1. O BNG leva alertando da situación do camiño de acceso á praia de Chamoso desde marzo de 2016, cando se produciu un importante desprendemento de terras sobre o areal que ademais deixou varias das árbores en situación precaria.

Despois desta denuncia, e ante a falta de sinalización do perigo, primeiro, e o agravamento da situación, máis adiante, rexistramos novas solicitudes para que o Concello solicitase actuacións urxente para a protección do talude, que polo de agora non se viron reflectidas en ningunha acción.

O temporal da primeira semana deste mes agravou ainda máis a situación. As fendas na capa de terra que sostén a árbore que se atopa nunha situación más precaria estenderonse áinda máis e a caída da mesma sobre a praia podería ocorrer en calquera momento. Esta situación é especialmente complicada porque este derrube podería afectar gravemente o camiño de acceso á praia, podendo, incluso, no peor dos casos, deixalo inservíbel. As actuacións para protexer o talude e o camiño semellan da máxima urxencia.

Ante esta situación, desde o BNG queremos ter resposta ás seguintes cuestións:

- Ten coñecemento o goberno sobre se se produciron avances nas xestións da Demarcación de Costas sobre esta cuestión?

- No caso de que áinda non se producisen avances, e tendo en conta que o retraso comeza a serinxustificábel, que se achega a época de maior uso da praia e que a probabilidade de desperfectos irreparábeis no talude e no camiño é cada vez máis alta, que alternativas manexa o goberno municipal para asegurar o acceso á Praia e a seguridade das persoas usuarias?

Resposta concelleira delegada M<sup>a</sup>. Eva García Amor: De momento non hai ningunha resposta, volverase avisar a Demarcación de Costas do problema de Chamoso. Farase un seguimento da evolución dos terreos nos próximos meses, valar convenientemente para deixar a zona máis segura e evitar accidentes.

b.1.2. Esta semana tivemos coñecemento da sentencia do Tribunal Constitucional sobre o Imposto sobre o Incremento do Valor dos Terreos de Natureza Urbana, comunmente coñecido como “plusvalía”.

Este imposto en teoría é un gravame sobre a revalorización dos inmobilés, pero en moitos municipios é pagado na práctica sempre que os inmobilés son vendidos, haxa efectivamente unha revalorización ou unha depreciación do prezo dos inmobilés. Esta situación foi declarada ilegal por parte do Tribunal Constitucional, ao cuestionar o cobro deste imposto cando se produce unha depreciación.

Ante esta situación, o BNG desexa ter resposta ás seguintes cuestións.

- Está o Concello de Cabanas entre os concellos que viña cobrando plusvalías por inmobilés que sufriron depreciación do seu prezo entre o momento da súa compra e da súa venda? En caso afirmativo,

A) a canto ascenderon estes cobros irregulares e en que período se produciron?

B) está o Concello preparado para devolver estes ingresos irregulares no caso de que se produzcan e prosperen posíbeis solicitudes de devolución?



- Cal é a estimación do goberno municipal sobre os efectos desta suspensión nos Orzamentos municipais futuros, tendo en conta que orzamentou 20.000€ de ingresos neste concepto para o ano 2017?

- Tendo en conta que este tributo está calculado parcialmente en base ao valor catastral dos inmobles, está disposto o goberno a rectificar a súa negativa a solicitar unha revisión catastral?

Resposta Alcalde: Entendemos que non porque ademais temos a ordenanza coa bonificación do 95% para as persoas de parentesco de 1º grao, hai o TRLRFL que claramente di como ten que ser a ordenanza, creo que cumplimos perfectamente.

b.1.3. Recentemente recibimos queixas da veciñanza sobre a existencia dun vertedoiro de diversos refugallos no acceso á área deportiva da Veiga.

Ante esta situación, o BNG desexa ter resposta ás seguintes cuestiós.

- É consciente o goberno da existencia desta zona de verquido?

- Cal é a situación legal dessa zona?

- Que actuacións ten pensado tomar?

Resposta concelleira delegada M<sup>a</sup>. Eva García Amor: si a zona é un terreo de propiedade privada vamos tomar accións para notificación ao propietario dos terreos.

b.2. Preguntas presentadas polo concelleiro de PDDdG Xosé Manuel Pérez Sardiña en escrito de data 21 de febreiro de 2017.

b.2.1. Camiño de facer dez anos desde que estoupo a burbuilla inmobiliaria e logo dun prolongado período de crise económica. Que tipo de axudas está a ofrecer o concello para iniciativas locais de emprego, tanto para emprendedoras como para empresas xa formadas?

Resposta Alcalde: somos un concello pequeno e temos unhas limitacións, estamos en coordinación con outras administracións, especialmente a Xunta, e a través do espazo Ferrol desde xullo 2016 tivemos alí 7 emprendedores dos que terminaron 6, tamén tivemos un curso o ano pasado de marca persoal da Dirección Xeral de Xuventude, xuntanza con empresarios de Cabanas, obradoiro con Ares, Mugardos, Fene e Neda especialidade xardinería-albanel, obradoiro co concello de Pontedeume e Monfero especialidade espazos naturais e xardinería onde saen formados co certificado correspondente, estamos xerando formación e actividade.

b.2.2. Á vista das necesidades do rural de Cabanas e tendo en conta a disponibilidade de fondos europeos. Que medidas toma o goberno local para dinamizar o rural?

Resposta Alcalde: estamos en colaboración co Grupo de Acción Rural Seitura 22, empezamos por unha charla aquí para explicar toda persoa, empresario ou todo aquel que necesite subvencións de axuda, non hai que esquecer a política da Xunta para o rural cun programa de custo cero.

b.2.3. No que respecta ao desenvolvemento económico e impulso de actividades de emprendemento. Existe un viveiro de empresas? Se non existe, cal é o motivo?

Resposta Alcalde: estamos traballando con empresas para coordinar novas iniciativas no Concello, vaise seguir coa promoción tapeando por Cabanas, desenvolvemento do programa Cabanas a fraga feita mar para promoción do turismo, formación e divulgación do proxecto para os grupos de interese local como pode ser a hostalería.

b.2.4. O Concello ten regulado deficienteamente na ordenanza de tráfico a expedición do distintivo de residentes o que motiva denegacións arbitrarias á veciñanza que o solicita por exemplo



fóra dun prazo que é descoñecido para a inmensa maioría da poboación. Que prazos se estableceron ata o presente ano 2017 para obter o distintivo de residentes? Hai algúin cambio no presente 2017 para expedir o devandito distintivo?

Resposta Alcalde: non é coñecedor de que houbera problemas, sempre se deu marxe para a renovación durante os períodos que corresponden, lóxicamente debe ser a inicios de ano, estase facendo ata o 31 de marzo, e incluso houbo anos ata o 30 de xuño, hai uns prazos porque a administración ten que estar ordenada.

b.2.5. O pasado 31 de xaneiro de 2017 a Demarcación de Carreteras do Estado en Galicia reiterou a solicitude dun informe sobre terreos cedidos á N-651. Que motiva a solicitude de informe de terreos cedidos ao Concello de Cabanas? Ten esta solicitude algunha relación coa execución do proxecto de mellora de seguridade vial?

Resposta Alcalde: o Estado quere coñecer o estado das cesións da estrada, o normal é que sexa con motivo do proxecto de humanización da N-651.

b.2.6. Segundo puidemos saber, a empresa concesionaria do servizo de abastecemento, sumidoiros e depuración cortoulle a auga a un veciño. Que medidas adoptou o alcalde en relación a este corte de subministración do servizo municipal?

Resposta Alcalde: vostede está afirmando algo que non é así, o veciño transmite por rexistro esa proposta de Viaqua e nos pedímoslle a Viaqua que explique o motivo, estamos a espera de que conteste.

b.2.7. En relación ao canon de tratamento de residuos sólidos urbanos houbo variación respecto de 2016? Se a houbo cal é a nova tarifa?

Resposta Alcalde: si houbo diferenza, a nova tarifa son 68,25 €/tonelada.

b.2.8. Despois de aprobar en Pleno un proxecto que non cumple a sentenza sobre o bloque II do Penso e sacalo a licitación. Cantas empresas se presentaron proposta para realizar a derruba da 2ª fase do Penso?

Resposta Alcalde: 17 empresas

b.2.9. En 2016, o alcalde anunciounos que a veciñanza de Laraxe xa podía solicitar enganche ao abastecemento municipal. Pódemos concretar cantos entronques de auga se realizaron en Laraxe desde o seu anuncio neste Pleno?

Resposta Alcalde: no saneamento déronse de estos días varios de alta, en abastecemento non me consta.

b.2.10. A Demarcación de Carreteras do Estado en Galicia requirió a limpeza de tenzas estremantes coa AP-9. Que medidas vai adoptar o concello para dar cumprimento a este requerimento? Hai algúin terreo afectado por herba da Pampa? Realizouse algunha memoria para erradicar esta herba invasora?

Resposta concelleira delegada M<sup>a</sup>. Eva García Amor: é verdade que na zona do polígono está invadido de herba da Pampa, esta semana estiveron rozando aquela zona e intentáronse botar produto para evitar que se estenda.

b.2.11. A Dirección Xeral de Patrimonio Cultural anunciou unha intervención no Camiño de Santiago. En que vai consistir a intervención? Sobre que traza vai actuar?

Resposta Alcalde: vai consistir na sinalización sobre a traza que está publicada no DOG.

b.2.12. Tanto a ordenanza fiscal do imposto de vehículos de tracción mecánica (IVTM) aprobada no Boletín Oficial da Provincia do 26.12.2016, como a anterior que foi derrogada, din no



CONCELLO  
DE  
CABANAS

seu artigo 8 que o padrón anual de dito imposto será exposto ó público por un prazo de 20 días para que os veciños poidan examinalo e, de ser o caso, formular as reclamacións oportunas. Por que o concello leva sete anos sen facer este trámite? Por que o alcalde non cumpre a súa ordenanza e o artigo 102.3 da Lei 58/2003 Xeral Tributaria?

Resposta Alcalde: porque isto está delegado na Deputación, é a Deputación a que fai a exposición pública.

b.2.13. Respecto á entrada en vigor da nova ordenanza de IVTM. Vai devolver o concello de oficio os cobros indebidos deste imposto aos veciños con minusvalía á que teñen dereito de forma retroactiva?

Resposta Alcalde: eu diríalle cal é o cobro ilegal deste ordenanza, vostede sabe que as ordenanzas son aprobadas polo Pleno, publicadas no BOP con tempo para alegacións, se non hai alegacións públicase a definitiva e queda en vigor.

b.2.14. Non tivemos novas da Casa de Xan Ares desde xaneiro, que foi sinalizada a raíz do perigo que advertimos insistentemente. Canto tempo vai seguir paralizado o procedemento de valoración? Que actuacións e en que prazo ten previsto realizar o goberno local para evitar o seu esboroe?

Resposta Alcalde: estamos a espera de recibir os informes definitivos.

b.2.15. A parcela das Raiolas no Areal ten dono coñecido finalmente. Informámonos de que xa se esgotaron todos os prazos para a súa limpeza voluntaria e que se anulou a multa ao anterior propietario. Cando se vai realizar a limpeza?

Resposta Alcalde: o 15 de febreiro de 2017 envióuselle o último comunicado cunha multa coercitiva de 1.000 euros, déuselle audiencia e é como está o proceso.

b.2.16. No convenio de Tejo co Concello asinado en 2013, que esta incorporado no expediente do PXOM, figura unha parcela co número 03 no campo do Oito. Esta parcela é cruzada pola metade por un camiño público que une o camiño de Lamelas coa ribeira do río Eume. Este camiño era o de entrada á feira do dia 8 e está documentado desde hai más de cen anos. Pode explicar o alcalde como permite a cesión dun ben de dominio publico a unha sociedade privada? Figura este camiño no inventario de bens do concello? Existe informe do arquitecto municipal e do secretario que respalde a legalidade de dito convenio?

Resposta Alcalde: esta pregunta creo que lle correspondería a vostede que estivo de concelleiro en corporacións anteriores, leva más anos que nos, e podería contestar mellor, incluso houbo proposta de compra de terreos que se debateu en pleno falando de 70 ou 80 millóns de pesetas, xardín botánico entre outros, parece que lle molesta que o concello se vaia facer con 8000 metros gratis, de todas formas cando teñamos o inventario de bens no concello falamos sobre o asunto.

b.2.17. As choivas converten a estrada estatal N-651, na travesía do convenio de 1983, nunha sucesión de ríos que a atravesan por unha deficiente recollida de pluviais, creando situacións de risco por aqua pláning. Rogámoslle ao goberno local que solucione os problemas de pluviais nas beirarrúas da travesía do Areal ata Cardeita e en todo caso que sinalice a situación de risco causada polo abandono no mantemento das marxes da estrada que lle corresponde ao Concello.

Resposta Alcalde: está pedindo que axilicemos a humanización da N-651, benvido ao clube da necesidade de facer esa humanización, ao final dáse conta de que é necesario facelo.

b.2.18 No cruce do camiño das Cavadas coa N-651 hai un anaco de terreo de ninguén que



CONCELLO  
DE  
CABANAS

34

está en deficientes condicións de tránsito despois da colocación dunha reixa para recollida de augas. Suxerímoslle ao goberno local que amaine este espazo para que poida ser transitado.

Resposta Alcalde: sempre que se fai a limpeza na N-651 tamén se trata de limpar esa zona e poñela en condicións.

A continuación a Presidencia levanta a sesión sendo as vinte e unha horas e cinco minutos da cal estendo a presente acta , e do que eu Secretario, dou fe.

Vtº e prace.

O Alcalde

O Secretario